

Vol. 44		Issue No. 31		Ramhlun North: Ni 01 August, 2026	
 BRANCH THU ■ ZADS Zone-IV huam chhunga Branch YMA-ten ZADS Member pathum theuh ruat tura tih an nih angin Ramhlun North Branch YMA atangin atanga member ruat chhuah te chu: 1. H. Rodingliana, BECM 2. Richard Saingura Sailo, BECM 3. Ronald Zothansanga, BECM An term hun chhung tur hi August atanga October thleng a ni ang. Tin, Ramhlun North Branch YMA chuan ZADS puih nan ₹ 5000/- kan pe baw a ni. ■ Pu R. Lalchullova, Zanlawn, ni 13.07.2026 (Thawhtanni) a boral chhungten RNYMA hnenah puan pahnih min pe e, Ramhlun North Branch YMA chuan lawmthu a sawi.  SUB-COMMITTEE THU ■ Library sub-committee: NI. Malsawmzuali , V-Sec. chuan ama lehkhazu ziah “Tleitir Awwawl” tih chu Library a dah turin a rawn pe a, Library sub-committee te chuan lawmthu an sawi. Vawiin chhun khan July 2026 chhunga Library tlawh thate hnenah lawmman sem a ni.  CYMA THU ■ Electoral Roll Special Intensive Revision kalpui mek chu dik leh felfai taka kalpui a nih theih nan a tul anga hmala turin Prof. Malsawmliana Gen. Secretary leh Er. H. Duhkima Treasurer te bakah CEC member atangin - Pu R. Lalduhawma, Pu Lalbiakkunga, Pu Lalsawma Ralte, Pu Zoramthanga, Pu PC Lalthanhlira, Pu R.L. Thanhnuna, Pu Ngurthansanga, Pu R.C. Zauva, Pu Anthony Lalhriatpuia, Pu Manliana, Pu R. Lalchhanhima ten Mamit an tlawh a, DC pisa-ah Election hotute nen meeting an nei. ■ Library duty turte: 1. RD Vanlalmangaihzei, N-Sec. 2. Ruth Biakchungnungi, T-Sec. 3. Lalnunpuii Hmar, T-Sec. 4. Lalremruatfeli Pulamte, K-Sec. 5. Zodinpuui Zote, T-Sec. 6. Lalmawizuali, S-Sec.		YMA ATANGA HRIATPUINA LEHKHA LA DUH TANA HRIATTIRNA Ramhlun North, the 1st August, 2026: YMA atanga hriatpuina lehkhahrang- Tribal Certificate la turte hriatpuina leh Residential Certificate la turte hriatpuina te a hnuaia mite hnen atang hian a lak theih e. 1. Pu Laldingliana Sailo, President, T-Sec. (7005164116) 2. Pu Biakchungnunga, Secretary, V-Sec. (9856293369) 3. Dr. Joseph Lalhmingliana, Assistant Secretary, C-Sec.(9436195087) Pem Lehkha & Testimonial bik chu Pu Laldingliana Sailo, President emaw Pu Biakchungnunga, Secretary emaw hnen atang lak tur a ni. YMA hriatpuina lehkhah la tur ten EPIC (Voter ID) leh Aadhaar card ken thin tur a ni a, kum tling lo Voter ID la nei lo tan an pa/nu EPIC leh Aadhaar card a ngai ve thung a, an Aadhaar card a ngai baw e. Tin, hriatpuina form-ah hian kumin atang chuan sorkar lamin an thlalak (passport size) bel tel vek tawh tura a tih avangin thlalak a ngai tel tawh tih kan hre dawn nia. Lehkhah la duh te kan kal thlawn loh nan a phone number tarlanah hian biak lawk thin ni se a tha ang e. Income certificate dilna hriatpuina erawh YMA-in a pe ngai lo tih kan hre tel dawn nia. YMA hi veng tin leh khaw tina a hmun thu leh vengchhung mite dinhmun hre chiangtu ber an nih avangin sawrkar pawhin hriatpuina lehkhah pek kawngah a ring ngam a, khawtlangah a cheng ngei em tih leh Mizo hnam peng zing ami a ni ngei a ni tih finfiah nan Sawrkar pawhin YMA hriatpuina hi a phut kher a ni. Tin, Pem lehkhah leh Testimonial te hi veng dang emaw khaw dang atanga pem lut leh pem chhuakte chanchin chhui zui zung zung nan a tangkai a, pem lut leh chhuak kan awm chuan kan awmna hmasa atangin YMA lehkhah kan la ngei tur a ni Ram leilung fate chanvo leh nihna hi vawnhim tlat tur thil pawimawh tak a ni a. Ram leilung fa niloten heng hmang hian ram leilung fate chanvo tur an chhuh dak thei a, an lo neih ve mai hi thil thiang lo leh dan in a rem tihloh a ni. Hetiang laka fimkhur leh venhimna thawk tur hian YMA hriatpuina lehkhah hi ngai a, a pawimawh em em a ni. CADS 3rd BATCH LAWMLUHNA LEH RUIHHLO TIHRALNA HUN HMAN A NI 28.07.2026 (Thawhlejni) tlai dar 3:00 khan Central YMA Hall, Tuikhuahtlangah Central Anti Drugs Squad (CADS) 3rd Batch, 2026 member tharte lawmluhna hun neih a ni a, he hunah hian Central Anti Drugs Squad (CADS) 2nd Batch leh Zone Anti Drugs Squad (ZADS) te ruihhlo man hrang hrang tihralna hun hman zui a ni bawk. CADS 3rd Batch Puipa turte: • Convener: Pu M.S Ralte, Finance Secretary, Central YMA • Asst. Convener: Pu Lalbiakkunga, CEC / Pu John Kima, CEC • Secretary: Pu Israela, CEC • Asst. Secretary: Pu Lalbuatsaiha, CEC CADS 2nd Batch hun chhung (22 April – 28 July, 2026) a CADS leh ZADS (Zone I - X) hrang hrangte ruihhlo man zawng zawng nimin a tihral tak te chu: • Heroin No. 4: Hawng 432, TicTac 1870 leh Chhinsen 998 — An rih zawng gram 5,935.22 g (5.935 Kg) • Methamphetamine (Meth): Tablet 90,061 • Ganja: 21 kg gram 894 • Cough Syrup: Bur 5,245 • Damdawi ruihchi (AP, Pregabalin etc.): Tablet 19,066, Box 1 leh Strip 6 Hemi bakah hian CADS 2nd Batch term chhung ringawt pawhin mi 19 te Home/Rehabilitation Center-ah dah niin, mi 53 te chu Excise & Narcotics Deptt. lamah hlan an ni a, mi 386 te hnenah Counselling neihpui an ni bawk.			



RAMLEILUNG FA

Mihring dam chhung leh khawvel awm chhung zawnga pawimawh reng tur chu "Ram leh Hnam" hi a ni. Ram a awm loh chuan hnam a awm thei lova, hnam a awm loh chuan ram pawh hian awmzia a nei hek lo. Ram leh hnam hi phel hrann theih miah lo, inkungkaih tlat an ni a. Chuvang chuan he ram chhunga chengte hian mahni nihna humhalh tlat hi kan duh thin a ni. Heng te avang hian "Ram Leilung Fa" nihna hlutzia leh a pawimawh zia hi kan hriat thar a ngai a ni.

Ram pakhat a awm hian, a tir atanga lo cheng a, chu ram leilung lo veng a lo humhalhtu Leilung Fate an awm ngei ngei thin. He leilung fa nihna hi midang, hmun dang atanga rawn pem lut emaw rawn awm ve mai te hnenah awlsam taka pek ve ngawt tur a ni lo sa hrim hrim a ni.

Rawn pem lut te hi hun a lo kal a, dan zawmin ram mi (citizen) an rawn ni ve mai thei. Amaherawhchu, "ram mi" nihna leh "leilung fa" nihna hi thil hrang daih a ni a. Hmun danga atanga rawn awm te khan chu ram leilung fa nihna chu an rawn nei ve ringawt thei lova, kan chantir ngai tur a ni hek lo. Leilung fa nihna ah hian kan pi leh pute atanga rim tak leh thi leh thau pawlh a an lo humhalh; kan tawng, kan zia leh kan nunphung a bet tlat avangin, hi thil hi pawisa leh thil dang hmanga neih ve ngawt theih a ni lo.

Pem lut te tan kan lo in phalzau leh awlsam taka leilung fate chanvo kan lo pek leh kan lo hawn sak mai hian, a ram neitu tak tak te chu mahni ramah mikhual zawkah an chang thei thin. Hei hian hnam tlem zawk nihna a tiboral chak em em a ni. Khawvel chanchin han chhui kir pawhin hnam tam tak chu an ram leilung fa nihna an humhalh zawh loh avangin an boral tawh a ni.

Chuvangin, kan ram leh hnam a boral loh nan leh kan pi leh puten min lo hlan chhawn, kan rochan hlu tak hi midang hnenah kan hlan ngawt tur a ni lo. Mikhual leh hmun danga rawn pem lut te hriatthiamna chin nei mah ila, leilung fa nihna leh kan chanvo erawh hi chu nghet taka kan humhalh zui zel a pawimawh em em a ni.



KHAWTHLIR

MARYMA TOBUL

Ramhlun North Branch YMA Ex-President Pu Lalchungnunga (L) sawi danin, March ni 4, 1983 zana Ramhlun Branch YMA Executive Committee meeting chuan YMA General Conference atan Sub-Committee hrang hrang a din a. Chumi zinga 'Publicity cum Publication' Chairman Pu K. Thanhira rawtna angin, chhungkaw tin deng chhuak thei tur kartin chhuak chanchinbu neih an rel ta a. A hming atan "Mizoram Aizawl Ramhlun Young Mizo Association" (MARYMA) tih an pawm a, vawiin thlengin he hming hi hman a ni. YMA-ah thil thar duang chhuak tur chuan Branch Executive Committee phalna dil thlap thin a ni. Mahse, YMA General Conference zawh hnu, 25 Oct 1983-a Branch Committee meeting Thurel No. 4-na a lo thlen meuh chuan, a bul tan dan fel tawh lo mah se, a hlawhtling leh a tangkai tak avangin "MARYMA hi a kalphung pangngaia a kal zel hi tha kan ti" tiin Branch YMA chuan formal takin a nemnghet ta a ni.

Pu K. Thanhira (Editor hmasa ber), Jt. Editors Lalchungnunga leh F. Laldailova, leh Manager V.Z. Kaia te ho hraina hnuaiah March 23, 1983 khan MARYMA issue hmasa ber chu tihchhuah a ni a. Kan hriat dan chuan kartin chhuak YMA chanchinbu nei hmasa ber Branch kan ni hial awm e. Mahse, hetiang hun laia kan chanchinbu tihchhuahah te khan Vol. No. leh Issue No. mumal takin kan hling lova, a hnu deuhah erawh chuan kalphung fel zawkin kan kal chho ta a ni. News Editor pawh a tirah kan nei hran lova, kan neih hnu thleng pawhin a tangkaina kan hmang thiam lawk lo. Inrinni chhun dar 12 hmaa chhut zawh fel hman a ngai thin a, a chhan chu Treasury Square-a Albany Cyclo Printers-a her chhuah a, agent-te hnena sem zui nghal a tul thin vang a ni.

Ex-President Pu H. Lalruatlina'n a lo sawi tawh ang in tute tih ngai loh leh kawng thar sial ngam hruiatu puitling an nihna an fakawm thlawt. Kum 1983 laia Branch YMA dang entawn tur awm hauh lo chung leh tualchhung chanchinbu a la vang em em laia chanchinbu din tura hma an lo lak ngamna khan kan hruiatu hmasate advance-zia a ti lang Chiang hle. kan hruiatu hmasate khan ngaihtuahna eng lo nei hmasain Branch YMA Chanchinbu nei hmasa ber nihna kawng an lo sial bakah hmawh an lo hmang thiam lutuk kha an chhuanawm thlawt a ni.

MARYMA header hi kuta mawi taka ziah thin a ni a, kar tin ziah a nih avangin hawrawp lian leh te hmangin an ti danglam thin. Krismas dawnah phei chuan a pheh hma berah vawh rawh lai lem leh a rawhtupa thuchhuah te thlengin thai bial chhungah

duhthusam takin an draw thin a ni. A hnu kum rei vak lovah hmasawna hmel a lo lang chho a, head hi kuta zia mai lovin Type-writer hawrawp (Dot & star) hmanga uniform ang reng taka chhut a lo ni ta a. Kum 1995 atang phei chuan Computer thiamnate hmang tangkaiin a head chu cheimawi a ni chho ta a. Kum 2001 a lo thlen meuh chuan, tlawmngai leh mi inphal tak tak te thawhkhawm hmangin MARYMA pual liau liau tur Computer, cheng 50,000 chuang man zet lei a ni ta a. Chutah a vawi khat na atan OFFSET Press-ah chhut a lo ni ta a ni.

A Chhuah tirh phat atangin thu tak leh chanchin thar hlang chuan a daih lo tih a Chiang hle. Mimal leh ngamtlak insawisakna kara fiamthu pangngai tak tak a awm fo a. Heng fiamthute hian veng inlungualna a siam mai bakah inpawhna tha tak a siam ve tlat thin. Infiam na tak thin veng hi an lo inlungual ru duh phian a ni ang e. Kan fiamthu thawhte a na thin khaih khaih em mai.

MARYMA bultanna zinga danglam tak chu vengchhunga 'BER' thlan thin hi a ni. Chhungkaw tinah form sem in, vote khat chhungkaw pakhatin an nei thin a, mipuite pawhin an phurpui em em thin.

1. Nula Hmeltha BER
2. Milar BER
3. Tlawmngai BER
4. Chhungkaw entawn tlak BER
5. Khawhar Ina kal taima BER
6. In leh a vel vawngfai BER

MARYMA fakawm em emna chu veng chhung chanchin thar a lawr kim em em hi a ni. A pheh thumna hi veng chhung mipuite chanchin phawrh chhuahna a ni a, chhiartu lamin an hlut hle. Damlo, innei thar, zin chhuak leh pem tharte chanchin a zawng kim hle. Veng chhung mi inthliar hranna awm miah lovin an leng vek thin a ni. Veng chhung pawl hrang hrangten neitu chan an chang tlang vek a. VC thupawimawh leh Sipai bang hriattirna chhuahah duhsak bik emaw hleih bik emaw a nei ngai lo. RSC leh MHIP thute chu headlines an tling a, MUP lek phei chuan pa chan hi an chang hliah hliah a ni. MARYMA hi kum 2002 leh 2003-ah YMA Chanchinbu Tha ber thlanna Central YMA buatsaih-ah Top-10 ah a lang a. Kum 2006 leh 2007-ah Chanchinbu Tha Ber atan thlan a ni.

"Engtik niah emaw chuan Ramhlun North History hi tute'n emaw an la zia duh ngei ang. Doctorate Degree lak nan pawh tute emaw chuan an la chhui duh mai thei e. Chutih hunah chuan MARYMA hi ala tangkai ngawt ang. Vawiin nia Ramhlun North thil thleng hi kum 50 ral hnua zir Chiang duh dawn ta ila, thil dang zawng zawng aiin MARYMA hi a rintlak ber ngei ang"

-H. Lalruatlina (Ex-President)

Editor: Vanengmawia (7085878827); **Jt. Editors:** A. Lalfakzuala, Lalrotluangi Zote, , Henry VL Nghilhlova Zote

Manager: Lalremsanga Hnamte (8974845644); **Asst. Managers:** Zodingliana, Lalrinchhana, Lalrinawma

News Editors: Lalrintluanga, Lalrawntluanga, Andrew Lalmalsawma, Samuel R. Lalmangaiha, D. Lianmanga, Vanalremruatpuia Ralte

Circulation Managers: PB Lalhupazauva, Samuel Lahlupua, Hmingthanzuala, Vanlalrinkima, R. Zodinsanga,

Zothankhuma, Lalrinchhana, K. Lalmuanpuia

ZIN & HAW

■ Pu Lalremsanga Hnamte (Manager), Lunglei lama hna thil a zin chu dam takin a lo haw leh ta. (sunhlu min lo hawn)

■ Pu Isaac Zothianghlima, BECM chu chhungkaw pawimawh buaipuiin Guwahati-ah a zin.

■ Pu Lalrinliana, BECM, Lengpui lama hnathawk a kal chu a lo haw leh ta.

■ Nl.Elizabeth Lalnuntluangi, BECM, hna thila Serchhip a zin chu a lo haw leh ta.

■ Nl.RB Vanlalmangaihzelei, N-Sec. Fin. Secretary, chu zirna thilah Agra-ah a zin.

■ Tv. Vanlalchhuanawma, N-Sec. c/m chu zirna thilah Agra-ah a zin.

■ Er. R. Lalthakima, T-Sec. chu check-up turin New Delhi ah an kal, a fapa Er Zosangliana Ralte in a kalpui.

■ Pu Lalhnehliana, K-Sec. in check-up a Kolkata a kal chu a lo haw leh ta.

■ Pu Lalthanfala Khiangte te nupa, N-Sec. te chu chhungkaw thilah Khawzawl ah an zin.

■ Pi Mary Lalnunpari w/o David Lalnpuia, V-Sec. hna pawimawh buaipuia Delhi kal chu a lo haw leh ta.

■ Lalbiakmawii d/o V. Engmawii te chhungkua, V-Sec. chu Guwahati atangin chawlh hmangin an lo haw.

■ Nl. Zosangpuii d/o K. Lianchhunga, K-Sec. chu a hna thawhna hmun Tuidu, Tripura atangin training turin a lo haw.

■ Nl. KC Ralte d/o J. Lalbuatsaiha (Fam), hna thil a lo haw chu a hna thawhna hmun Ambasa, Tripura lamah a kal leh ta.

LAWMAWM

■ Pu G. Lalremsanga leh Pi Lalrinzaui te nupa, S-Sec. te chuan ni 28.07.2027 khan Synod Hospital, Durtlang ah fapa an nei.

THILDANG

■ **Ruangchhuak:** Lalpari, K- 74 chu ni 31.07.2026 (Zirtawpni) khan LRM Hospital-ah a boral a, a ruang hi Pu Lalpawlliana, N-Sec. te inah chawlhpuia a nih hnuin an khua East Phaileng panpui a ni.

JOHAN'S COMPUTER INSTITUTE (JCI)

(GOVT. APPROVED INSTITUTION)

Near LH Thanga Enterprise, Industry Peng, Ramhlun 'N'

Contact No. 7005608874

COMPUTER CLASS (Jul-Dec Session)

(3-1)

FREE ADMISSION OPEN

COURSES:

1.DCA 1st & 2nd Sem 2.Editing (Photo/Video)

3.Application mal pawhin a zir theih e.

Timing: 6:30am-8:00am | 9:30 am-5:30pm | 7:00-9:00pm

(Weekdays a kal hman lo tan pawh Inrinni a zir turin kan ruahman sak thei e)

COMMON SERVICE CENTRE (CSC)

kaltilangin hengte hi kan ti thei bawh

PAN CARD | Learner's Licence | MUCHS Card/Golden Card | GST Registration

Indian Passport | UDYAM Registration | Revenue (eRAM) | Motor Insurance |

Ticket Booking (Train / Flight) | Income/Residential/Tribal Certificate | Xerox |

Printing (Photo/Document) | Laminate | Binding | Online Form Fill up, etc.

DAMLO

■ Tv. Lalrinpuia, BECM chu pum lam diklo avangin in lamah enkawl mek a ni.

■ Pi Lianngurpuii w/o Pu Lalchhuanawma, BECM chu LRM Hospital-ah a pile zai a ni a, enkawl mek a ni.

■ Tv. Hrangchhuana Hmar s/o H. Vanlalhruaia, N-Sec. c/m chu khawsik avanga hun engemaw chen in lama a inenkawl hnu ah ziaawm lam a pan leh ta.

■ Nl. Lalmangaihzelei w/o BK Lianmanga, K-Sec. Fin. Secretary, Synod Hospital, Durtlang a awm chu in lama inenkawl chhunzawm turin a lo chhuak.

■ Lawmsangzuali Ralte d/o Victor Lallawmawma, K-Sec. c/m. khawsik avanga Civil Hospital, Aizawl a awm chu dam takin a lo chhuak leh ta.

■ Pi Thanzami w/o Pachhunga (Fam), K-Sec. taksa lam chaklohna avanga Nazareth Hospital-a awm chu in lama inenkawl chhunzawm turin a lo chhuak.

■ Pi Khianghluni, C-Sec. chu natna hrang hrang vangin, ZMC&H ah enkawl mek a ni.

■ Zosangpuii d/o Lalmunsiamia C-Sec. chu Aizawl Hospital-ah enkawl mek a ni .

■ Pu Malsawmthara, K-Sec. chu Greenwood Hospital-ah taksa lam chak lohna avangin enkawl mek a ni.

■ H. Lalrothara s/o H. Thanmawia (Fam), C-Sec. pumna avanga Synod Hospital, Durtlang a enkawl chu dam takin a lo chhuak leh ta.

■ Dr. Lianthangpuia te nupa, N-Sec. Champhai lama chhungkaw thil a kal chu Khawzawl ah an chesual hlauh mai a, in lamah enkawl mek an ni.

■ Teresa Lalmangaihi w/o Johana (Fam), V-Sec. chu in lamah enkawl mek a ni.

■ Lalrempuii Zadeng d/o Chawngthankimi, V-Sec. chu Care Hospital-ah enkawl mek a ni.

■ Lalnuntluanga s/o Vanrotluanga, C-Sec. Greenwood Hospital-a awm chu a lo chhuak leh ta e.

PAWL DANG

■ **Ramhlun North Football Club:** RNFC Academy admission ti duh tan heng category U-8, U-10, U-12 & U-14 ah te hian admission a tih theih reng e.

Academy fee tur te:

Registration fee - ₹ 500/-

Monthly fee - ₹ 300/-

Jersey suit man - ₹ 500/-

Admission tihna tur:

Pu Thantea - 9862375861

DCA COMPUTER COURSE

ADMISSION OPEN

(5-1)

December 2026 Exam

Free Benefits

Free Admission

Free Textbook

Limited Seats Available

E-STAR.COM

GOVT. APPROVED

COMPUTER

INSTITUTION

RAMHLUN NORTH

E-STAR.COM

Near Nazareth Hospital

Ph: 8731875084/7005421131

LOCAL COUNCIL

■ Fur ruahtui tlak hun a lo ni leh ta a, vengchhung mipuiten kan in leh a vel leimin hlauhawm a awm leh awm loh te enchiang a, hetiang thil a awm chuan Local Council te hnenah a rang thei ang a inhriattir turin kan in ngen a ni.

KOHRAN

■ **Presbyterian Kohhran, Ramhlun North:** August ni 1-2, 2026 chhung hian Ramhlun North Pastor Bial, Kohhran Pavalai Pawl Kum Chanve Intawhkhawm, Ramhlun North Presbyterian Kohhran ah nghah a ni dawn a, Intawhkhawm ah hian thu leh hla hmanga inpawl khawmna neih a ni ang. Kum Chanve Intawhkhawm hi ni 02.08.2026 (Pathianni) zanah a tiak ang.

■ **Baptist Kohhran:** July ni 30, 2026 kha TKP Din champhaphak kum 75-na (Platinum Jubilee) anih angin TKP Ramhlun North Unit te pawhin hemi pual hian inkhawm an buatsaih a, inkhawm tan hma in Jubilee dar vuain inkhawm banah Jubilee cake an zai bawh. Platinum Jubilee denchhen tho hian June ni 5, 2026 khan Ramhlun North thlanmualah TKP te hian hnatlangin thla pahnih (2) an lo lai tawh bawh a ni.

MARYMA ARCHIVES

Tunlai hian MARYMA Editor te zun inah ek tum, theuneu lo tak a awm fo mai. Kiltin atanga uluk taka han en pawhin a lo chhuahna mawng hi a puitling thaw khat tih a hriat theih. A zialo ngel ngul em mai, a titu chuan sim mawlh teh se. - **14.07.1990**

Thla a eng lo awm khi Mizo chuan Bung emaw an ti a. Pu Kunga chuan injector emaw a ti a, Jeffreya Pa chuan Kuang siam tur emaw a ti a, Patlanga chuan mithi lumen tur emaw a ti a, Tv. Ruatlana'n Zarda Pan emaw a ti a, Pu Marema'n Bazaar nu ho emaw a ti a, Pu Marina'n Hardware emaw a ti a, Pu K. Lalruata'n uisa emaw a ti a, Nl. Dingpuii'n KVI Loan la tur intlar emaw a ti a, Asawma'n changel hnah hnuaia khau ti ze zu emaw a ti a, Tv. Laldingliana Sailo erawh chuan Mangovi emaw a ti thung. – **8.05.1999**

HRIATTIRNA

Pi Melody Lawmzuali d/o S. Laimana hian a LSC No. Azl. 1597 of 1994, Sakawrtuichhun ami chu tibova rawn insawiin office-ah Re-issue a rawn dil a. A dil anga tihsak a rem lohna chhan engpawh hria chuan chanchinbu a chhuah atanga ni 30 ral hma ngeiin a hnuaia address ziaak ah hian hriattir tur a ni. Hetiang a LSC thar pek chhuah leh a lo nih chuan LSC hmasa chu cancel nghal a ni ang.

Sd/- Assistant Commissioner (Revenue)

Aizawl District: Aizawl South

MARYMA		PHEK 4-NA		RN YMA CHANCHINBU	
 ARTICLE		 ADVERTISEMENT			
INFIAMNA LEH VANTLANG HMUN VAWN THIANGHLIM - Henry Zote, Jt. Editor Mipui vantlang puipunna hmun leh infiamna hmun faina leh thianghlimna hi khawtlang hriselna leh mipui nawlpui khawsak hona atan a pawimawh em em a. Sawrkar leh vantlang hmun pawimawh Ramhlun Indoor Stadium te, RSC Field te hi infiamna hmun,thalaite/naupangte tanin chherchhuahna hmun pawimawh em em mai a ni a. Hengte hi khawtlang tana hmun pawimawh, rohlu tling a ni. Infiamna hmun hi taksa sawizawina hmun, hriselna atana hmun pawimawh bik, ruihhlo laka thalaite hruai penna hmun pawimawh ni tura duan a nih rualin kan infiamna hmun leh a chhehvelah hian infiammi puitling zawk tura ngaihte hian ualau tak leh midang hmai eng zahna pawh nei mumal lova zu an in lai hmuh tur a awm leh thin hi a zia lo hle mai. Heng ang thil hian khawtlang a tihtawp mai bakah a bula hnaia cheng mipuite tan a ninawmin, naupang leh hmeichhiate tan a him lo em em bawk a ni. Infiamna hi hmun zahawm tak a nih laia a tihbawrhbang zawnga khawsa thin kan awm hi a pawi tak zet a ni. Sawrkar leh vantlang hmunhmaa kan khawsak dan hian thangthar ah nasa takin a tha zawng leh a tha lo zawngin nghawng a nei thei a. A tha lo lama nghawng a neih theih dan han chhuizui ila. 1. Entawn Tur tha lo (Role Model Violation): Infiamna hmun leh mipui punkhawmnaa puitling leh infiammi zawkten zu an in hian naupang leh thalaite tan entawn tur tha lo tak a hnutchhiah a, ruihhlo hman pawi tih lohna leh tih ve chhin chakna a neih tir thei a ni. 2. Hma Taka Hmelhriattirna (Early Exposure): Vantlang hmuna zu in an hmuh fo avangin thalaiten ruihhlo an hmelhriat hma a, hei hian an thluak than dan leh rilru puitlinna thlengin a tihchhiatsak thei a ni. 3. Chet Dan Hlauhawm Leh Hliam (Risky Behaviors & Injuries): Puitlingte entawna zu in ve naupangte chuan chet dan hlauhawm an ching chho a, hei hian chetsualna leh hliam tawrhna an hmachhawn phah thin. 4. Hmun Him An Chan (Loss of Safe Spaces): Infiamna hmunte hi thalaite intuaitharna tur hmun him a nih laiin, ruihhloin a luhchilh hian thalaiten hmun him an chan phah thin. Dan anga hremna Lek kawh theih Dan: 1. MLP Act Section 6(2) & 6(3): Vantlang hmuna zu in/ruih avangin fines, jail tan emaw community service peka hrem theih an ni. 2. BNS 2023 (Section 355 & 270): Public Nuisance (Mipui tana hnawksak) siam avanga criminal action lak theih a ni. 3. Disciplinary & Administrative Action: Club/Stadium Management ten membership cancel, tournament ban thlengin action lak theih a ni. 4. Permit nei pawhin a theih loh: Mizoram-ah 'Red Card' emaw zu in phalna permit neite tan pawn vantlang leh sawrkar hmunah chuan zu in a khap bur a ni. In luih chu dan bawhchhiatna a ni a, hrem theih an ni. 5. Public Nuisance & Safety: Indian Criminal Laws (Bharatiya Nyaya Sanhita) hnuaiah vantlang tana harsatna siamtute chu hemi hmang hian hrem theih an ni. 6. Mizoram Police Act, 2011: Vantlang hmun a zu in/ruih leh vantlang tana hnawsak, ninawm thlentu a nih chuan, thiam loh chantir an nih hnuah court-in hremna (fine) a chawitir thei ang. Stadium & Club Hruaitute Mawhphurhna: 1. Infection & Surveillance: Stadium chhunga screening leh CCTV camera hmanga ruihhlo pai lut leh tihtinte lo vil ruk. 2. Strict Regulations & Suspension: Stadium chhunga "Zu in khap a ni" tiha notice tar a, bawhchhetute chu member cancellation leh tournament ban thlengin disciplinary action lak. Heng hmun pawimawh vawn thianghlina kawngah hian Club hruaitute (Management), Tualchhung Hruaitute (Village Council/ YMA)leh Law Enforcement Agencies-te'n mawhphurhna pawimawh tak tak an nei.					
KC TUI Tui thianghlim leh fim tha em em, Pick up in litre 2000; tlawm takin kan pe thei e. Ph: 9774 223 462 / 7005 010 327 (10-7)					
VANLALFELA SEPTIC TANK Septic tank paih fai, commode block, pipe, soak pit tha lo leh a thar pawh kan siam thei reng e. Kan sulhnu a felfai a, service hlun leh rin tlak kan ni e. Hmanrua engkim kan intodelh bakah kan rate a tlawm e. Contact: 9436199884 (10-2)					
L.H. SEPTIC TANK SERVICE Septic tank paihfai leh repairing engkim kan thawk thei e. Kum 17 chuang experience nei kan ni e. Rate: 4500/- per trip Ph.: 6909183193 (23-1)					
KHIANGTE SEPTIC TANK SERVICE Septic Tank khat paihfai, khur chung lutin, Comode Block, Soak pit thar siam, Pipe Repair engkim a neitu te lungawi na thlap in kan thawk thei e. Contact - 9862344971 Bawngkawn South (20-2)					
JM SEPTIC TANK SERVICE Septic tank khat paih fai, comode block, pipe fit, soak pit tha lo leh a thar pawh kan siam thei reng e. Kan sulhnu a fel fai a, service hlun leh rintlak kan ni e. Rate: inbiak remna. Registration: MRS 542 Contact: 9862476439 (10-9)					
TLUANGTEA SEPTIC TANK SERVICE Septic tank khat paih leh repair kan ti thei reng a, rate chu inbiakremna a ni ang. Contact: 6033373188/9612376373 C/o Marina: 9436140350 (10-9)					
MAFELA SEPTIC TANK SERVICE Septic Tank khat paih fai, commode block, pipe fit, soak pit thar siam engkim kan ti thei e. Rate: Inbiakremna Ph: 9233440125 (10-10)					
VANCHHAWNG SEPTIC TANK Septik tank khat englai pawh in kan paih fai thei a,repair,commod block,pippe block kan siam thei bawk e, Rate: Inbiakremna Ph. no: 9615458679 (10-3)					
RAMHLUN NORTH SEPTIC TANK KHAT TAN Septic Tank Paihfai leh Repairing engkim kan ti theih e. Comode “Block, Pipe Fit,Ek in khur leh,Soak pit tha lo,a thar pawh kan siam theih reng e” RATE: INBIAKREMNA Mb-9863524969 / 9383178166 (20-5)					
ALLCLEAN SEPTIC TANK SERVICE Septic Tank paihfai, a khurpui repairing leh a thar siam, pipe fitting, commode block, soakpit a hlui repair leh a thar siam, etc. engpawh kan thawk thei vek e. Eng hunah pawh koh theih kan ni e, en man a awm lo e. Rate: Inbiakremna Contact: 6009002567 (10-4)					
MD SEPTIC TANK SERVICE Septic Tank paih fai leh commode block, soak pit hlui leh a thar kan siam thei a, pipe fitting engkim kan thawk thei e. Rate: Inbiakremna Ph: 8258950077 (10-2)					
SP TUI Tui hna thianghlim, ei leh in tlak, litre 2000 pickup trip kan pe thei e. Mobile: 9615789047 (15-9)					
Published & edited by Vanengmawia for and on behalf of Ramhlun North Branch YMA. Copies- 1,270					